



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :



Tir Yimym



tir\_yimym



tir yimym

TAPAK 8



PM Modi-i Argentina aser Brazil  
densema linük 5 semdangtsü

Tammy Abraham Besiktas  
nung adentsü renema lir



VOL. XXII ISSUE NO. 258 (ADOK 258)

DIMAPUR

RASEMNÜ (WEDNESDAY)

CHITENI (JULY) 02, 2025

₹ 5.00

## Ao Senso Telongjem Dimapur-i sangdonger

**Dimapur, Chiteni/July 01 (TYO):** Ao Senso Telongjem Dimapur (ASTD) menden ajanga June 26, 2025 nü Meyi Jamir (Mongsenyimti) aser Rohit Kumar Sah s/o Dharannath Sah na tsüngda ken o dak sendakba nung ajaki metettsü atema sangdong ka agütsüogo.

Rohit shiba aonsutsü ayoker ka lir, pai ni aibelenogo aser Meyi Jamir dak zükogo ta tai nangzük nung Ao sobaliba dak aketba ama Mongsenyimti Senso Telongjem Dimapur ajanga Ak ka senchi chiogo. Akhi mapang ak mang semer (30) tashi achiba lir aser asen sobaliba nung shiruru takum senchi ya tematiba temerenshi lir

aser yaki aibelener tepsettsü melen shiruru azü agi alangba temaitsü sayur, ta ashi.

Yamaji tangatetba tajung nung Mongsenyimti Senso ajanga FIR-a magütsüi senchi tilaka ajanga merenshia tembangogo aser iba dak alia ken o mera aotsü kecha mali.

Nübur-i ayimtenba ama aibelen sang indang Trade License cancel sütsütsüjibo lokti tentet kecha daka tashi mali. Anungji iba ken o dak sendakba nung kecha timtem mali aser mangajemba kar danga lira ASTD dangi arua iba ken o asüngdangtsü sangoktsür, ta ASTD sangdong ajangasa ashi.

## Nagaland nung July 8 tashi tzünglu arutsü: NSDMA

**Dimapur, Chiteni/July 01 (TYO):** Nagaland State Disaster Management Authority (NSDMA) ajanga sangdong ka nung July 1 nungi tenzüka July 8, 2025 tashi district ajunga nung tzünglu arutsü, ta metetdaksüogo.

Iba mapang district ajunga nung tsüngmok aser tsüngi dener arutsü akok.

July 2 nungi tenzüka July 6, 2025 tashi district timba nung tzünglu kanga sashia arutsü takzüteta lir. Kiphire aser Tuensang nung July 2 & 3, 2025 anogotem tzünglu kangasa sashia arutsü amai lir.

Anungji iba mapang tsüngi aiba mesüra mopung sashia aonba nungi jenbua alitsü aser nüngdakba mera agitsü tongtipang lir, ta NSDMA sangdong ajanga ashi.

Aruya aliba anogo ishika tsüngta lenmang nung

senzüsempongba aser tesendaktep nunga kongshitsü akok. Tenemlen tzünglu kanga sashia arutsü takzüteta aliba mechi Nagaland telemok aser tenemtsüng district tem, talisa Dimapur, Niuland, Chümoukedima, Bhandari, Baghty, Tizit, aser Tuli nung tzü atsüngdenba aser ajungben tzümetsüng adokba alitsü akok.

Anungji NSDMA, Hime Department ajanga nüburtem dang iba mapang lendong timtem majurutsüsa kumdanga alitsü ayongzüker, ta ashi.

NSDMA, Home Department-isa District Disaster Management Authorities ajunga dang aser sendaktepa aliba department tem dang tzüngluruwa mapang nisung takum aser ki o jen kumzüka ayutsü asoshi saksalema alitsü ayongzüka liasü.

## GST ajanga rongsenketzüng ainba nung tali lirumedemer

**Dimapur, Chiteni/July 01 (TYO):** Linük nung GST benoker mezüng küm trok (2017-2023) tsüngta Nagaland densema north eastern states nung compound annual GST revenue growth rate shilem 27 shi lir, koba national average shilem 14 dang kanga agi temaba lir, ta Additional Commissioner of CGST, Sashi Wapang Lanu-i ashi.

Dimapur nung GST Day Celebration 2025 sentong nung jembidang GST ya Nagaland atema "game-changer" lir, ta pai ashi. GST ajanga state ya India indang rongsenketzüng ainba otsü nung tali lirumedemer ta ashi aser GST kübok region nung tajangzük tongtipang kar

lemsatepa liasü.

India nung ita shia GST bendenba rongnung Apirl 2025 nung timtiba liasü, kong sen 2.37 lakh crore bendentet aser kasa ita Nagaland-i timtiba jenjang tanabuba bendenteta liasü, ta pai ashi.

Industry tulu maliba ajanga akhi mapang nungi Nagaland indang rongsenketzüng nung tax revenue sources kanga ajema aru. Ajisüaka GST ajanga Nagaland ama consumer state nem tax revenue tali agütsür aser iba tax revenue proportion timba - shilem 70 tashi - angur. Item fiscal strength ya tangbo ki o jen yangluba, healthcare aser education amala tongtipang sectors tem nung amshir, ta

## Naga nunger temeden wazüka ayutsü tasü ita nokdaker: DNSU

**Dimapur, Chiteni/July 01 (TYO):** Deputy Commissioner nem June 26, 2025 nü tezüluba nung agüja aliba ama Dimapur nung indigenous inhabitant certificates aser ali temeden dak sendakba nung ashikülak mapa inyakba anema Dimapur Naga Students' Union (DNSU) akang-akanga nokdaka lir.

Iba tezüluba nung Nirmal Jain nem ashikülak yimya amshia indigenous inhabitant certificate agütsüba jungjunga bushisüngdangtsü jangja-jangja shia lir. Tribal Units ajunga den kanga junga shisa lemsatepa jembishinüba sülen iba mera ya agi, ta DNSU sangdong ka ajanga ashi.

Naga nunger nem ochi obendang agütsütsü atema Deputy Commissioner-ia kanga junga bushisüngdangtsü shiogo, aser yangji DNSU nokdaka lir aser ochi temai adoktsü asoshi onok akaktsü, ta ashi.

Iba ken o ya Naga nunger aser non-Nagas indang masü saka Nagaland nung aliba nüburtem aser Nirmal Jain ama mapa tamajung inyaker indang lir, aser Naga nunger temeden wazüka ayutsü temulungtetba nung DNSU indang-indanga nokdaka lir aser iba ama mapa tamajung agi asen nübur

ashioktsüba anendaktsütsü. Pa ama mapa tamajung inyaker ka asen lokti nung alitsü tesem maka.

Tejangja non-Nagas tem arua ozüng kübok alitsü aser shishilempatsü onoki nokdanga mali aser pelashishia agizüker, ta sangdong ajanga ashi.

Asen maitsü aser asen lima kumzüka aser wazüka ayutsü asoshi azü tokshiba asen Naga nunger aikati amadoker amai ajiteter. Ajisüaka shinga nema asen nübur mashi lenmang nung manisadaktsütsü mesüra iba amala mapa tamajung inyaker nem system den masayadaktsütsü.

DNSU nung tenzüker temi nüburtem aser Tsüngrem matsüngdang nübur tenzüksü tenangzükba kulizüng agitepa lir aser onoki tatem tashi onoki nangzükba ama inyaktsü. Asen takum Tsüngrem kabu nung lir, aser ozü sanenluden züngsem kar nem danga timtem agütsüra, Nirmal Jain aser iba ashikülak mapa nung shilem agia alirtem khuret asütsü, ta DNSU sangdong ajanga ashi.

Iba ken o nung DNSU asüngteta aser ochi nung nokdaka lir, aser kuli tejangja aliba pelashishia agizüksü, saka kija, CSOs mesüra "low and high-ranking officials" kari danga

mashi lenmangi anisaba mesüra tiazü olulu prokshiba lira, DNSU-i parnok anema tenüng menüktsüba ken o benokba kisüng masü saka onoki parnok yimjak nung tutettsütsü.

DNSU-i ochi tangatetba aliba nübur, lokti tentet balala dang onok den külemi iba tongpang nung nokdaktsü ayongzüker, kechiaser iba ama ashikülak mapa nungi asen Naga nunger maitsü aser ali temeden wakzüka ayutsü asoshi külemi nokdaktsü tongtipang lir, ta ashi.

Maneni DNSU sanenluden mesüra züngsem kar dak danga merenshiba, amokmerenba mesüra tenük yokba lira, onoki tashi ajak amshia yimjak nung item nisungtem temai adoktsütsü, kechiaser tang Nirmal Jain-i ozüng alema mapa tamajung inyakba temai adoktsüba sülen onok dak tesem balala nungi tsüksühr.

Maneni Nagaland nung aliba nübur ajunga dang kumdanga, renemshia alitsü aser nüngdakba mapang külemi lungjemer nokdaktsü ayongzüker. Ketdangsür temi tasü ita mapa shidak inyaktsü onoki yongya atar aser Dimapur nung aliba lisopur temeden wazüka ayutsü asoshi nüburtemi nungittsü, ta DNSU sangdong ajangasa ashi.

## Taxi kibur, operator & driver temi ILP shidak amshitsü ayongzüker: NSF

**Dimapur, Chiteni/July 01 (TYO):** Naga Students' Federation (NSF) indang Inner Line Regulation Commission ajanga interstate aser inter-district taxi kibur, operators aser driver tem dang Bengal Eastern Frontier Regulation

(1873) - Inner Line Pass (ILP) system akumtsüboa amshitsü ayongzükogo, kechiaser Nagaland indang melenshitsü makokba security aser sobaliba asoshi ibai tamendak dak lir.

Operator ajunga dang passenger tem gari nung maniok tsüngta Government of Nagaland-i agütsüba ILP tejangja bena ali-mali jangjatsü mepishir. Passenger shirnoki nüngdakba document magütsüteter, parnok nem yimya tajung agi service magütsütsüla, ta ashi.

Kasa mapang non-indigenous Naga driver temi gari indang All India Taxi Permit den külemi pei indang ILP tejangja bener senzütsüla. Ketdangsür nem mapang meintoki sayutettsü asoshi operators temi item permits ya digital mesüra physical records anepalua ayutsü imlar, ta ILRC sangdong ajanga ashi.

ILP tejangja maliba nisungtem anir senzüba ya Nagaland indang regulatory framework kübok ozüng

alemba lir. Aibelener nem Bengal Eastern Frontier Regulation (1873) indang Section 6 kübok temerenshi tesashi agütsütsü aser yangji senchi achiba, gari pua ayuba aser permit meyipa agiba dena lir. Iba ama ozüng nung aibelenba ya state security protocols anema inyakba den sako lir, ta sangdong ajanga ashi.

ILP system ya sorkar ketdangsür temi yimya ka ama inyakba maparen ka masü mesüra tebilemba lemsatepba ka masü - ibai Nagaland nung lisopur, ecosystem aser sobaliba kumzüka ayutsü asoshi ozüng jong ka lir. Temelaba makai aitba ajanga lenla aisü nung timtem agütsür, ta ashi.

Anungji asen temeden wazüka ayutsü asoshi nenokia bendanga agütsür inyaktsü ayongzüke aser Commission-i maneni tajungtiba nung mittsü asoshi inyaktsü aser kasa mapang nenoki iba temeshi mapa külemi inyaka asen tasoli wazüka ayutsü tamang akar, ta ILRC sangdong ajangasa ashi.

ILRC sangdong ajangasa ashi.



## Price statistics dak sendakba nung training agi



Secretary to the Government of Nagaland, Economics and Statistics, Akunu S Meyase, IAS den ketdangsür tejentem, desos aser trainee tem price statistics dak sendakba nung anogo ka state level training agiba mapang tangokba noksa nung angur.

**Dimapur, Chiteni/July 1 (TYO):** Directorate of economics and statistics, Nagaland-i ayongzüka price statistics dak sendakba nung July 1 nü directorate conference hall nung anogo ka training agiogo. Iba sentong nung Secretary, Economics and Statistics Akunu S Meyase alakteta jaoker liasü.

Sentong nung o jembiba mapang Akunu S Meyase-i, price statistics koda tongtibang aser iba ajanga consumer tem

dak anogoshia kongshiba indang lemsatep. District level nungi bendenba price yagi state nung price indices asadangtsü atema data base kümteter, koba ajak dang tongtibangtiba jenjang lir.

Laisa, data bendenertem dang data ya shidakba source nungi bendentsü aser shitak asadangtetsü atema data shitak agütsütsü mepeshi. Lai, training nung shilem agirtem dang training ya süoki ia agitsü, aser data bendenba inyakyim balala kanga junga angazüktsü

ayongzüka liasü.

Okila jembiba mapang Director Neidilhou Kreditsu-i, department-i consumer price index (urban, rural & anaprongla), industrial worker tem atema consumer price index aser wholesale price index ta indices asem yanglur lir, ta ashi.

Paisa, policy balala yangluba mapang price indices amshiba aser iba ya koda tongtibang iba indang lemsatep. Pai ashiba agi, department-i tang mezügbuba district level atema cpi asadangtsü, koba ajanga planning decentralization tajungba kümdaktsütsü.

Iba training sentong nung district economics & statistics officer ajak, urban aser rural price centre tem nungi price data bendener ajak aser directorate ketdangsürtemi shilem agia liasü.

## Kiphire DLSA-i 1buba Legal camp ayongzüka agiogo

**Dimapur, Chiteni/July 1 (TYO):** Kiphire District Legal Services Authority (DLSA) den Aadhaar Enrolment Center, Kiphire aser Department of Economics and Statistics, Kiphire nunger longjemmer SAATHI Campaign 2025 kübok mezügbuba legal awareness aser outreach camp agiogo. Iba sentong ya June 30 nü District Court Complex, Kiphire nung agia liasü.

SAATHI Campaign ya linük ajunga nung National Legal Services Authority (NLSA)-i benoka inyakba inyakyim ka lir. Iba sentong ajanga teyari aser teküzmükba nüngdaka aliba tanurtem jangjateta parnok Aadhaar atema züngoksemdakja parnok temeden balala den sendakteptsüba den school nung züngoksemts, welfare schemes balala agidaktsütsü aser nüngdakba mapang nung legal teyari agütsütsü asoshi teyari agütsür. Iba inyakyim ajanga legal services machinery ya lendong nung aliba tanurtem ajak tembar akümba sayur aser iba ajanga shinga sentoka metoktsütsü asoshi jenjang agir.

National Legal Services Authority (NLSA) indang national SAATHI inyakyim kübok Legal Awareness Camp ya district kübok District Court Complex, Kiphire aser ADC Office, Pungro Town nung agiogo.

Arishi küm 18 tekübok aliba tanur shirnok tepezük tia mesüra lendong agi meneptsü ana nung ali, parnok Aadhaar nung züngoksemdaktsütsü, Birth Certificates aser Permanent Residential Certificate agizükdaktsütsü nükjidong nung iba camp ayongzüka agiogo. Iba ajanga parnok sorkar scheme balala, kaketshisatsü bushiba nung tajangzüktem aser legal tsütsü parnok tangutsü tim tajangzüktem agitsü asoshi maongka agütsütsü.

Sentong nung Kiphire kübok tsürapur, guardian aser lokti nung ken o dak sendaka alirtemi shilem agiogo. Sentong ayongzüka agiba mapang tanur 85 Aadhaar nung takok ngua züngoksemogo, tanur 46 Birth Certificates yanglutsü aser tanur 39 nem Permanent Residential Certificates agüja liasü.

## NU-i admission atema jaoker

**Lumami, Chiteni/July 1 (TYO):** Nagaland University-i, 2025-26 Academic Year atema UG/PG/PhD aser tanga programme tem atema applications tem jaokogo. National Education Policy 2020 den putepa programme ajak yagi entry aser exit options aika agütsür aser jenjang ajak nung kuli kaket agütsütsü.

Undergraduate aser postgraduate course tem atema online application ya July 1 nungi 20 tashi lapoktsütsü aser PhD Program tem atema June 20 nü lapoktsüogo aser July 12, 2025

tashi lapoka alitsü. D.Sc/D.Litt/LL.D programs atema Online Application ya July 1 aser 20 tsüngda benoktetsü.

Tejangrartemi iba link- <https://nagalanduniversity.ac.in/English/Admission> ajanga apply sütetsü.

University nung department 43 aser research centre pongu lir aser iba den Environmental Science, Law, Commerce, Education, Engineering, Linguistics, Political Science, aser Biotechnology amala discipline tem nung tesayuba aser research facility balala agütsür.

## DHFW nung tepila sentong agi

**Dimapur, Chiteni/July 1 (TYO):** Department of Health and Family Welfare-i July 1 nü ketdangsür asem den tepila sentong agiogo.

Sentong nung Principal Director Dr. Mereninla Senlem-i mapa toktsüba ketdangsür Dr. Vezokholu Theyo, Director; Dr.

Neisakho Kere, Additional Director; aser Tiatoshi Amer, Joint Drugs Controller nunger nem kuli kaket agüja liasü.

Iba sentong ya Dr. Sendimeren Aonok, Director (Health and ME) lenisüba nung IDSP Hall, DHFW nung agia liasü.

## Tsüngrem sempet aketer-i Physiotherapy clinic ka lapok

**Dimapur, July 01 (TYO) :** Dimapur nung Spirit of Faith tenla ki anasa temang nung teret teloktep, tezüttera aser tetsü nung timtem alir asoshi Physiotherapy clinic ka tenüng agi “ PhysioHome” ka tanü Intanki National Park nung Director aser Conservator of Forest (Wildlife), Wb.Aochuba IFS-i lapoktsüogo.

Iba clinic lapokba sentong nung tepela o tatsüka jembidang, iba PhysioHome lapokla Dr.Bendangnaroi ashiba agi, Tsüngremi la nem la tanur asüdangyongi nisungtem temang nung tezü sütetsüraba aser teret loktetlokrabattem yanglutsütsü asoshi sempet agüja liasü aser iba kasa sempet amshia nisungtem yaritsüsa

medemer kar ajanga la Physiotherapy azüngtsüsa maongka anguba asoshi parnok dang pelar aser Tsüngrem tenüng asanger ta metetddaktsü.

La ya Rajiv Gandhi University of Health Sciences , Bengaluru nung azüngba Physiotherapist ka lir aser Indian Association of Physiotherapists nung Life member lir.

Tanü iba PhysioHome ya meshiteta Set Free Ministry nung sannüker Sünep Emkongi sarasademtsü.

Iba PhysioHome ya Hombar nungi Honibar tashi anogo shia anepdang 9:30 nungi nikongdang 4:30 tashi lapoka alitsü. La den jembinertemi mobile number 8414985153 ajanga jembitettsü.

## CTN nung card, certificates aser flex menügdak ka lapok



Changtongya town nung The Local Press lapokba sentong nung adenertem agiba noksa ka yangi angur . (June 27, 2025)

**Dimapur, July 01 (TYO) :** Tanü putu tensa den apet printing press ka tenüng agi, The Local Press ta sur June 27, 2025 anogo nung Changtongya Town nung sentong tajung ka agia lapokogo.

Iba sentong nung Changtongya Town aser temeket yimtsüngtem nungi Arogo nung sannükertemi anir lenirtem, Institution aser community nungi teshimtet nebutem, Town council membertain, Akhoya aser Changtongya nungi yimten yimsüsürtem aika arua denogo

Iba Printing press ya adianu ana, Yangerlong Jamir aser Imtitangit Longkumer na longjemmer nung tenzüka mapa ka lir. Iba press lapokba nükjidongji tongtipangsa yimtsüngtem nung city aser town nung anguba quality printing maparen inyaktu kanga timtem tulu ajuruba ngua, jenjang dalangtiba agi yimtsüng nung alirtem asoshi printing mapa tajungtiba inyaktütsü asoshi lapok ta tenati

metetddaktsü.

Talisa iba press ya ajanga Tuli- Changtongya-Mokokchung corridor aser temekut neburtem ajak asoshi maparen tasen aser tajangzük tulu asütsü. Iba printing press nung Wedding Cards, arogo aser lokti program, Brochures, Certifictaes, Magazines aser Flex-tem menügtetsü aser ano tula (Jerseys), marok (mugs) aser nungo oset memento-tem yanglutetsü. Iba dak alaka ano school, NGOS aser business tapu balala atema digital software services, website development, branding aser yamala maparen inyaktetsu ta parnokisa ashi.

Tarutsu nung iba press ya ajanga ano local entrepreneurs, self-help group aser aluyimertem a yaritetsu lenmang kar lapoka aotsu aser iba press ya area ajunga asoshi teyari tajung angudak tesem ka asutsu mangdang tulu lir ta press lapokertemisa lemsatepa liasü.

Iba sentong nung Changtongya Town council

nung mendenbuba Wb.S.Temjennüsang Jamiri Pringting Press tajung lapokba asoshi telapoker nem tenüngsang agütsü aser nübortem nüngdak aser teyari angudak küma takok ngua inyaka aotsü asoshi ajungshi.

Kasa sentong nung Changtongya Village Council nungi Tatar Wb. T. Imo Jamir , Akhoya Village Council nung mendenbuba Wb. B.Tiatemjen Longkumer aser Changtongya Town Business Association tenüng nung Wb.Tiayanger nungertemi tepela aser tadjungshi o jembia liasü.

Iba TLP tenzüka sentong CBA sannüker Rongsen-i sarasadema tenzuk aser Wb. T. Ali Lkr-i tarurtem pelaa agizükba o lemsatep . TLP asoshi temeshitetba aser temoatsü meshiba sarasadem Changtongya Town Baptist Arogo nung sannüker Rev. Temshi-i ketdangsüa agia liasü. Iba sentong nung Wb.Mangli, Asso. Pastor (Youth) CBA menden liasü.



# PM Modi-i Argentina aser Brazil densema linük 5 semdangtsü

**New Delhi, July 01 (Agencies):** Ato kilonser Narendra Modi-i July 2 nungi tenzüka July 9 anogo tashi nung Africa aser South America nung aliba linük pongu semdangtsü aser Brazil nung BRICS summit nung shilem agia adentsü.

BRICS senden nung tawa kiralongrartemi Jammu & Kashmir kübok Pahalgam amakba aitsütsü, ta India nem jelia metetdaksüogo.

Ato kilonser Modi-i Ghana, Trinidad & Tobago, Argentina, Brazil aser Namibia linüktem semdangtsü. Ato kilonseri item linüktem nung lenirtem den senden mena shishilembaba, defence, energy, technology, aluyimba aser health onüktem nung o lemteptsü.

Ministry of External Affairs nung Economic Relations Secretary, Dammu Ravi-i, BRICS senden nung kiralongra sashia aitsütsü, ta metetdaksü.

Osangbenertem den jembidang pai, BRICS züngsem linüktemisa kiralongra onük nung India pusemtsü, ta metetdaksü.

"Iba senden nung kiralongra tebilemtsü anema inyaksü aser kiralongra pusemba linüktem anema inyaksü asoshi jembitsü. Kasa senden nung alima nung tongtimbang tebilemtsü onüktem nung o lemteptsü," ta pai metetdaksü.

Modi-i July 2-3 anogotem nung Ghana semdangtsü. Tesüiba küm 30 tsüngda tang mezüng India nunger Ato kilonser kati iba linük

semdangtsü. Modi-i Ghana nung lenirtem den rongsenkettzüng aser defence tsütsü tesendaktep tajungba akümtsü atema jembitsü.

July 3-4 anogotem nung pai Trinidad & Tobago semdangtsü aser iba linük denji pharmaceuticals aser renewable energy sectors nung tesendaktep tajungba akümtsü atema jembitsü.

July 4-5 anogotem nung pai Argentina semdangtsü aser iba linük den defence, aluyimba aser mining sectors nung partnership tajungba akümtsü atema jembitsü.

July 5 nungi July 8 tashi pa BRICS senden nung adentsü. Iba mapang nungji pai Brazil nung lenirtem den India nunger Akash air defence systems atema jembitsü.

Tatensa July 9 nü pai Namibia semdangtsü aser rongsenkettzüng tsütsü tesendaktep tajungba akümtsü atema jembitsü.

# Siddaramaiah maneni CM inyaksü: Congress

**New Delhi, July 01 (Agencies):** Tang Karnataka nung Congress party telung nung mangatettep adoka lia itemji bentettsü atema party nung bangdak lenirtemi Rajya Sabha MP, Randeep Singh Surjewala Karnataka-i yoka lir.

Mongolbarnü Surjewala-i, Karnataka nung lenir memelentsü aser Siddaramaiah maneni chief minister inyaksü, ta metetdaksü.

Chief minister Siddharamaih aser deputy chief minister DK Shivakumar na tsüngda mangatettep ajanga Karnataka nung Congress sorkar anokshitsüsa aliba tensa ka nung bangdak lenirtemi Surjewala yok.

Osangbenertem den jembidang pai, "Karnataka nung lenir melentsü tebilemba mali, yashi-a ni kasa telangzüba agüja liasü aser tanü-a telangzübaji kasa dang," ta metetdaksü.

Surjewala ya Karnataka Congress incharge lir. Pai Karnataka nung MLA tem den senden amenbaji peipei constituency nung inyakba mapatem asadangtsü asoshi ayongzük, ta pai ashi.

Mongolbarnep Karnataka

minister Priyank Kharge-ia, party nung melung masüba mali mesüra chief minister melentsü atema tebilemba mali, ta metetdaksü.

Paisa, Siddaramaiah ya chief minister aser DK Shivakumar ya pa deputy aser Karnataka unit Tir lir, ta metetdaksü.

Paisa, "Tim sabang nung pei tebilemba lemsateptsü atema ajak nem temeden agüja lir. Kari danga lenir dak melung masüba lira parnoki osangbenertem den masü saka party bangdak lenirtem den jembitsüla. Party telung nung melung masüba mali. Chief Minister melentsü tebilemba mali. AICC Tir, PCC Tir aser CM-i jangjajanga ajak shiogo, anungji tangari jembibaji nüngdak mali," ta metetdaksü.

Hombarnü CM Siddaramaiah aser Shivakumar napronglai teka amteper osangbenertem dang, state nung Congress sorkar tashi itta lir, ta metetdakja liasü.

Karnataka deputy chief minister DK Shivakumar-i, state nung lenir melentsü atema kecha mejembir, anungji Chief Minister Siddaramaiah aser Congress sorkar tashi itdaksütsü atema dang rangloker inyaksüla, ta ashi.



Sangareddy district, Telangana nung aliba Sigachi Industries' pharma plant nung reactor ka apokba tesem nung Fire & rescue sepaitem aliba noksa nung angur. Iba lendong ya Hombarnü atalok aser Mongolbar tashi nung iba lendong nung nisung 36 asüba jangjaogo.

## India aser Pakistan nati tepuokdak alirtem list lemsatep

**New Delhi, July 01 (Agencies):** Mongolbarnü India aser Pakistan nati peipei linük nung jail nung puoka alir civilians aser angopurtem list lemsatepogo.

2008 küm tezüngzüktep agia aliba 'Agreement on Consular Access' nung ajemdaker küm shia January 1 aser July 1 anogotem nung tepuokdak alirtem list lemsateper.

Ministry of external affairs-i ashiba agi, India-i linük nung tepuokdak balala nung puoka aliba Pakistan nunger civilian 382 tenüng aser angopur 81 tenüng metetdaksüogo. Yamaji Pakistan-ia par linük nung aliba jail tem nung puoka aliba India nunger civilian 53 aser angopur 193 tenüng lemsatepogo.

India-i Pakistan dang tekaraba nung sensotemji chiokang, talisa jail nung kümsük

abensar alir senso 159 chiokang ta metetdaksüogo.

India-isa Pakistan dang, India nunger asütsüa akok, ta bilema aliba nisung 26 ajurutsü atema ketdangsertem nem temelaba agüjang, ta mepishi.

India-isa Pakistan dang jail nung puoka aliba India nungertemji mechiok tashi tajungtiba nung anepaludaktsüner, ta mepishi.

India-isa Pakistan dang tekeraba nung Pakistan nunger asütsüa akok, ta bilema aliba nisung 80 maitsü jangjatsüla, ta metetdaksü.

2014 küm nungi tenzüka tang tashi nung Pakistan-i India nunger angopur 2,661 aser civilian 71 chiokogo. 2023 küm nungi 2025 küm kija nung Pakistan-i India nunger angopur 500 aser civilian 13 chiokogo.

GOVERNEMENT OF NAGALAND

DIRECTORATE OF TECHNICAL EDUCATION

NAGALAND, KOHIMA

/Dated, Kohima the 1st July 2025.

NOTIFICATION

NO.DTE/ESTT-24/2020-21: Inpursuance to the Department Notification of even number dated 23rd May 2025 and corrigendum dated 26th May 2025, the shortlisted candidates based on academic marks scored at various level are informed that there will be an interview on 8th of July 2025 in the conference Hall of Directorate of Technical Education, as per the scheduled given in the tabulation.

The candidates are informed to bring all the documents in original from class X (HSLC) onwards during the time of interview. Failing to bring documents in original shall forfeit their candidature.

| Sl. no. | Name of Post                  | Name of Candidates    | Date & Time of Interview |
|---------|-------------------------------|-----------------------|--------------------------|
| 1       | Lecturer in Civil Engg.       | 1 VIKUOBEITUO KELIO   | 10:00 am - 10:30 am      |
|         |                               | 2 ELIZABETH B KHUVUNG |                          |
|         |                               | 3 VISEVOTO VITSO      |                          |
| 2       | Demonstrator in Civil Engg.   | 1 TIAMONGLA           | 10:30 am - 11:00 am      |
|         |                               | 2 TEMSUIENLA IMSONG   |                          |
|         |                               | 3 NUNGKAM C KONYAK    |                          |
| 3       | Lecturer in EEE               | 1 KEVITHUTO KECHU     | 11:00 am - 12:30 pm      |
|         |                               | 2 JESSICA Z SWU       |                          |
|         |                               | 3 MEDEMRENLA TZUDIR   |                          |
| 4       | Demonstrator in EEE           | 1 NUKUVOLU KEYHO      |                          |
|         |                               | 2 KEVITHUTO KECHU     |                          |
|         |                               | 3 JESSICA Z SWU       |                          |
|         |                               | 4 MEDEMRENLA TZUDIR   |                          |
|         |                               | 5 RAZOTO VESWUH       |                          |
|         |                               | 6 KALIVI V YEPTHOMI   |                          |
|         |                               | 7 TUMBEMO N SHITIRI   |                          |
|         |                               | 8 KHRIESAVITO CHUTSO  |                          |
|         |                               | 9 T MHARHONI TUNGOE   |                          |
| 5       | Instructor in Electrical shop | 1 KEVITHUTO KECHU     | 1:00 pm - 1:30 pm        |
|         |                               | 2 JESSICA Z SWU       |                          |
|         |                               | 3 MEDEMRENLA TZUDIR   |                          |
| 6       | Lecturer in Mechanical Engg.  | 1 IRENE KEMP          | 1:30 pm - 2:00 pm        |
|         |                               | 2 EJEMARIAM NGIYESHU  |                          |
|         |                               | 3 PHILIP TEP          |                          |
| 7       | Instructor in Machine shop    | 1 PANGAI T KONYAK     | 2:00 pm - 2:30 pm        |
|         |                               | 2 KHEKIHO N CHOPHI    |                          |
|         |                               | 3 WEENEI AKAMI        |                          |
| 8       | Lecturer in Physics           | 1 MAPUSOLA IMSONG     | 2:30 pm - 3:00 pm        |
|         |                               | 2 KEDO YHOSHÜ         |                          |
|         |                               | 3 CHANGKUMLA C        |                          |
| 9       | Demonstrator in Automobile    | 1 KUTO CHUZHÖ         |                          |
|         |                               | 2 NOGHICHU THONG      |                          |
|         |                               | 3 JOHN N CHANG        |                          |

(Er. VIPULHOU LHOUNGU)  
Director

GOVERNMENT OF NAGALAND

DIRECTORATE OF HIGHER EDUCATION

NAGALAND: KOHIMA

NO. HED/GRANT-IN-AID/4/2012-13/222

Dated Kohima, the 2nd July, 2025

NOTIFICATION

Eligible **NAAC Accredited & AAA Inspected** Private Secular Colleges and Government **Affiliated/Accredited** to category **A&B** for Theological Collegesare hereby informed to download the **Grant-in-Aid** form for the year **2025-2026** through the Department's website **www.highereducation.nagaland.gov.in** and submit the filled up form to the undersigned from **7th July to 31st July 2025**. Forms will not be accepted after the stipulated date.

Sd/-  
Ex-Officio Director  
Higher Education  
Nagaland: Kohima





## TIR YIMYIM YIMOBILEM (EDITORIAL)

DIMAPUR

RASEMNÜ

CHITENI 02, 2025

### Shiba dang asüngdangder ?

**A**lima nung asenok tanur tain ajak asoshi asüngdangdak ya kanga tongtibang lir. Aji oda, Tsüngrem dak amangertemi mapa ajak Tsüngrem dang asüngdangder inyaker. Iba amaji kidang kibong nunga apuani na tsüngda kati ka dang asüngdangtepa inyaker aser tanurtemia tsüraburtem dang asüngdangder. Iba amaji kati ka den shisalemsatepa taküm nung telemtetba agiba ajanga len aia moi shitakleni aoer aser tamakok angutsü melen takok angur. Atangji, alima nung ajak metetba nisungbo shinga mali, anungji aika meteta liaka, ano memetetba aika tangar dang asüngdangtsüla adoker. Iba ama mapang nung kibong nung süra tsüraburtemi tanurtemi metetnubatemi kecha arendaka melii asüngdangtetsüsa medemer ama kumadoksüla aser takoker atemabo kidang kibong nung tanurtem o tsüraburtem na metetnüa alibatemi asüngdangtepa metettsü asoshi mapang aser tesem tajungtibaji kibong tekülem ya lir. Kibong tekülem ya asenok aikati ken ka tener Lai ka zünger külemi sarasademba sentong ka amai dang bilemer, saka kibong tekülem mapangji kinungertem külemi mener sensaksemtsü mapang tajungtibaji asütsü. Iba mapang nung kati ka angazükteper. Kasaji, arogo aser lokti nunga tanishirtem o nübortem na tsüngda metetnüa alibatemi temulung lapoka sensaksemtettsüsa mapang aser tesem shimteta alitsüla. Tatishitsü agi, arogo nung nisung kati Laishiba azünger saka mangateter, anungji aji angatetnüa asüngdangdak aser telangzüba angudak tesem aser mapang alitsüla. Kasaji lokti aser yimten nunga nübortem o lenirtem na tsüngda asüngdangnüyonga masüngdangtettsüsa aser majuruteptettsüsa tetsüngda mayutsüla. Item nüngdaktemji ataloktsütsü asoshi lenirtemia aser nübortem taru matai bushia aotsüla aser kibong nung tsüraburtemia tanurtemi asüngdang matai parnoki metetnüba aser taginubatemi reprangteta asüngdangteptsüla. Aji oda, kibong nunga aser lokti nunga asüngdangtepbba agi timtem aika paidoker saka masüngdangtepbba agi mataloktsüba timtema aika ataloker. Ano, tanü putu yabo akhi putu amato masü, nisung dang masüngdangyonga aser nisungi mashiyonga computer machine dang asüngdangder aser nisungi meshitetba aser memetetba dena machine jagi langzür. Aji oda, computer machine-sa asüyonga yashi tashibo tesüiba aser tatalokbatem indangang asüngdanga liasü saka tanübo computer machine nungisa asüyonga Artificial Intelligence (AI) dangbo asen tia aser tarutsü indang dena asüngdangder. Aji oda, azümasener atemabo onük ka jembitsü mesüra sermon ka renemtsü asoshi kecha balaka kaketter bushia azüngtsüa menügdaker aser Laishiba-a mebushiyonga jungjunga bushir jembir ama jembitettsü. Kasaji, nüngdak zülutsü asoshia peisasa mezülutetra, akhi mapang nung amato, tangar dang asüngdangtsü menügdaker saka Computer machine nung aliba AI dangji dang asüngdang nung pai jungjunga zülur agütsütsü. Iba putu nungji asenok alir, anungji tanübo kaketshidaki maortemang tashiba aser temetetba akümer. Iba ama putu nung asen tanurtemi dang masü saka asenok tsürabur aser lenirtemi dena Laishiba aser kaketter zünga shisatsü bushitsü melen asenoka Computer machine nung aliba AI dakji dang metaloker lira, asenokji asangsang nung alima nung alir memesük akümer asütsü. Aji oda, tanurtemi tsüraburtem dang aser asenok rongnunga kati ka dang memetetba aser metetnüba asüngdangtepa telemtetba agitsü melen asenok ajak asüngdangdongji AI kümra, AI ji dang masü saka asenoka 'Artificial' kumadoksü. Iba ama putu nung asenok ajak kumdangtsübaji asenok ya 'artificial' masü 'natural' asütsüla aser asen dang asüngdangtsü melen AI dang asüngdangtsüsa asenoka aser asen chirnurtema malitsüla. Kasaji, Tsüngrem dang asüngdangtsü melen asen tarutsü indanga AI dangang asüngdangtsüsa asenok litetra, asenoki memetetika akhi mapang süng long dang asüngdanga külemba putui meyipa aoer asütsü.

## OLEMSABANG

### Ki Naro

A.J. Ramok Jamir, Salangtem Ward, Mokochung

Asen Aotsür "Ki Naro" nüngjalok, oboula nunger Chungliyimti nung alidang kodang ki tasen ka yangludir tebur aser tetsür külemi yaritepa alu mapa ki mapa ajak külemi dang yanglua inyak, kodang nikongdang kiji renemtsü mapang atonger ano tetsürtemi chiyungtsü anganua agütsür. Idangji parnoki kilem kolakji kanga mejungi ajitet, anungji parnoki teburtem dang yamai ashi, kilem kolakji onoki kanga tereprangtsü mejungi reprangteter, anungji nenok teburtem rongnung nok techira bener tanopur tashi tait ana kilem kolakji süsümedema alangtokang ta ashi, anungji parnoki yamaji inyak aser iba kilem kolak juteta adoka süsümedema adokba jagi kiji onsara tepur jungdaksü. Anungji iba anogo nung jagi Chungliyimtitsürtem dang "Ki Naro" nüngjalok ta tetsürtem ajak dang ajar.

### Mei mapang temang timtem/shirang adokbatem

Source - Internet

#### MEIWA MAPANG SHIRANGTEM:

Meiwa mapang viral fever, diarrhoea, typhoid, urinary tract infection, hepatitis aser summer migraine nungertem ajanga kangshir. Tatsük asadanga nung 35 degree Celsius adena tua atsükba ajanga asenok temang nung aliba tzü tajemba akümer aser iba ya ajanga asenok mangmanger aser anibelem tali meteter. Ano asenok temang nungi tzü tali endokba koktettsü atema tzü tamajung dena ajemer aser ibaji ajanga tashidak balala menar.

#### KANGA BULUA ADOKBA TASHIDAK KAR

##### Typhoid

Typhoid tashidak ya Salmonella typhi ta ajaba mesen tila ka ajanga adokdaksür. Iba mesen ya tzü ajanga menateper aser chiyungtsü aser tzü tamajung ajemdang asenoki menar. Typhoid tashidak ya temang merükmejua ayuba aser temeket merüktetba ajanga noktangtsü akok. Iba tashidak nungi kumzüka alitsü atema vaccines ana lir.

##### Jaundice

Jaundice dang Hepatitis A ta ajar. Iba tashidak ya-a tzü ajanga menateper. Iba tashidak ya Hepatitis A virus ajanga adokdaksür aser merükmeju maliba tesem nung achiajemba ajanga iba tashidak menar. Hepatitis A agi tera kangshiba atemabo kecha balaka anepalutsü nüngdak madoker aser nisung timbaka mapang tatsüka tsüngda nung jungadoker. Iba tashidak noktangtsü atema vaccine ka lir saka hygiene shitak amshiba aser talisa mapang shia teka metsükba ajanga hepatitis A nungi kumzüksü.

##### UTI

Meiwa mapang urinary tract infections (UTI) nungi kumzüka alitsü kanga tongtipang. Meiwa mapang asenok temang nungi tzü talila endoker aser iba den tzü shitak mejembra, asenok poktsütem nungi janga junga meindoktsü aser ibaji ajanga bacteria timba kumdaktsütsü aser natzü anaba shilem nung timtem balala adoktsü. Anogo nung tzü marok ti ajemba ajanga UTI nungi jenbutsü akok. Tzü ajemba ajanga asen poktsütem nungi bacteria odaktsür, anungji item bacteria timba mekümtettsü aser natzü aoba shilem nung timtem malitsü.

##### Summer migraine

Iba ya tekolak anghoba timtem tapu ka lir. Anü tatsük nem pudaktsüba aser temang nungi tzü talila aoba ajanga mangmangba aser temang kongkonga kumdaktsüba ajanga tekolak angor. Meiwa tekolak anghoba nungi jenbutsü atema tzü peria ajemtsüla aser anü tatsük nem mepudaktsüi anüshi bener senzütsüla.

##### Diarrhoea

Meiwa mapang tzü peria manguba ajanga poksen aoba timtem adoker. Mei mapang tzü nung mesentem talila züiner aser iba ya ajanga tashidak adokdaksür. Mei mapang poksen aoba nungi kumzüka alitsü atema tzü temolu ajemtsüla aser süngjanglijang achitsüla. Talisa süngjang tzü, narikol tzü aser tzü aketba süngjangtem achitsüla.

##### Food poisoning

Mei mapang chiyungtsü nung miim chisemba timtem talila ataloker. Bacteria ya tzü, mopung aser nisung o shiruru temang ajak nung lir aser tatsük mapang item ya tekaraba ainer. Tatsük mapang nisung mang nung timtem agütsüba bacteria tem talila akümer aser talisa chiyungtsütem nung item bacteria melamela teimba akümer. Chiyungtsü nung miim chisemba ajanga nisungtem saktsüdaksür aser poksen odaktsür. Anungji, mei mapang chiyungtsü mashii machitsüla aser kanga kumdanga tajung-tamajung tendanger ang achitsüla.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



Missionary Graham Staines tepseter kati jail nung Khrista agizük



Missionary Graham Staines'er kibong noksa

**July 01, 2025:** 1999 küm Odisha state nung Australia nunger Khristan missionary Graham Staines aser par jabaso ana gari nung mi agi rongseta südaksüba ken o nung aija jail nung puoka alir kati Yisu Khrista agizüka liasü.

Missionary Staines den par jabaso ana- Philip (10) aser Timothy (7) nunger aonung gari telung nung amoi oa lia gari nungji mi senoktsür par asemprong rongseta südaksüba ken o nung Mahendra Hembram-a aija taküm piyong tepuokdak ayutsü obendang agüja liasü.

Iba ken o nung 2003 küm pa-a aija liasü. Pa jail nung aliba mapang nung pai Khrista agizükogo, ta osang ka ajanga metetdaksü.

Kasa ken o nungsa Dara Singh-a aija liasü. Iba ken o nungsa tai tonglokja alir karbo chiok aser karbo temerenshi obendang- jail kümsük ajema agütsü.

Jail ketdangsertemi, Hembram (tangbo arrshi küm

50 dak tema) jail nung küm 25 aliba mapang nung pai pa taküm jenjang asadang aser taküm melenshia liasü, ta ashi.

Odishia kübok Keonjhar nung aliba jail nungi chiokdangbo pa taküm kanga junga melenshir liasü, aser jail nung staff temia pa nüngtem nung tepila sentong tajung ka ayongzüka katsüogo.

Pa jail nung alidang pai Yisu Khrista agizüka Khristan akümba dak sendakba nung Khristantemi tebilemba balala lemsatep.

Odisha nung Khristan putir aser meimchir temeden atema inyaker kati, iba ama ozüng alema mapa tamajung inyaker ka Khristan akümbaji mamangteter, ta ashi.

Ano Khristan lenirtem karibo, iba ya Tsüngremer taochi lir ta ashi saka karibo yimsü nung ajemdaker mapa tamajung inyaker ka chiokba nungji lendong lir, ta ashi.

2002 küm missionary Staines den par jabaso ana rongseta südaksüba ken o dak

sendakba nung Hembram-i pai aibelenba nangzüka liasü, ajisüaka pa chiokba anogo nungbo pai aibelen mali, ta pai ashi.

Missionary Staines aser par jabaso ana rongseta südaksüba tatalokba osang angashia India nung dang masü alima tesem balala nung alirtemi iba tatalokba aija liasü.

Iba mapang nungji missionary Staines-i India nung sensaker tribal nisungtem nem medical teyari agütsüba den külemi leprosy agi shirangertem yaria liasü.

Staines o pa kinüngtsü Gladys na den chirnur ajaki mission mapa inyaka liasü.

2005 küm India nung high court kati Hembram taküm piyong tepuokdak ayutsü obendang agütsüba pu-sema liasü aser 2011 küm Supreme Court-ia kasa obendang agütsü.

Ajisüaka Odisha nunger remission policy nung ajemdaker pai jail nung taküm junga aliba atema pa jail kümsük ajemja liasü.

UK nung MP ka nem Kibuba benjung nung shilem magidaksü



MP, Chris Coghlan

**July 01, 2025:** UK nung MP kati 'assisted dying bill' pusema vote agütsüba agi par Arogo nung putiri pa nem Kibuba benjung nung shilem magidaksü.

Dorking and Horley nungi Liberal Democrat MP, Chris Coghlan-i Terminally Ill Adults Bill pusema vote agüja liasü. Tan ita tetenzüklen House of Commons nung iba bill atema vote agütsütepa iba bill agizüka liasü.

Arogotemibo iba bill anema campaign agi.

Coghlan-i, Dorking nung aliba St Josephs Catholic Arogo nung putir, Ian Vane-i tamalen

pa dang shidi ka ajanga iba bill pusema vote magütsütsü ajungshia liasü, saka pai iba bill pusema vote agütsü, ta metetdaksü.

Iba sülen taoba hopta Arogo nung putiri Kibuba benjung nung pa nem shilem magidaksü.

Osangbener den jembidang Coghlan-i, "Parliament nung MP temi pei nija tangatetba nung vote agütsür, ajisüaka Khristan putiri kati yimjak nung nisung noklang aika matsüngdang maaksütsüba yabo tim masü," ta ashi.

Tamalen Bishop Moth-i Arogo nung lenirtem dang peipei Arogotem sasep nung MP tem dangi shidi zülua iba bill anema vote agütsütsü mepishiang, ta metetdakja liasü.

UK House of Commons nung iba bill ya agizükogo aser maneni House of Lords nung benoktsü. Iba bill ajanga teimla makai shirangertem aser ita trok mesüra iba dang nungi tajemba taküm alitsüpurtem süadoktsü

atema temelaba agütsütsü.

June 20, 2025 nü 'assisted suicide' bill atema vote agütsüteptsü lia Khristan telok aikati Khristantem dang 'assisted suicide' bill anema sarasademang, ta mepishia liasü.

'Assisted suicide' ya ozüng akümtsü atema Scottish Parliament nung bill ka benoka lir aser England o Wales nunga Westminster nungbo iba bill agizükogo.

Joko teimla makai mapang talangka shi nung kanga timtema shirangertem yaria südaksütsü atema ozüng ajanga temelaba agütsütsü asoshi vote agütsüteptsü anogo ishika dang lia Khristan teloktemi item ozüng magizüktsü atema sarasademtsü ayongzüka liasü.

Iba bill anema The Christian Institute, Affinity, CARE, Christian Medical Fellowship, Christian Concern aser Evangelical Alliance longjemer tayongzüka agüja liasü.

ANO GO ABEN TSÜNGREM DEN

Temeshi aser Mimpang - T.ken 77:11-20

Asaphi süngjema melitet. Pai tasüngdangba aika Kibuba dang asüngdang. Pa tezü atangba tatembang nung pa tesüngmangtsü telemtetba agütsü. Mezüngbuba, "O Tsüngrem, ne leman temeshidak lir; ozü Tsüngrem ama tulu Tsüngrem shiba ali?" (A.13). Tanabuba, " Ne leman tzüym nung lir, aser ne tsüngsütem meputet" (A.19).

Tamang kuli meimlaba leman nungi kuli asüba. Mezüngbuba, Tsüngremer leman temeshilen lir, ta Asaphi ashi. Pa lemanji meshitettsüba aser temeshi leman lir. Tsüngremi asenok taochi dangi anir aser taochi nungi sentsüwangshi dangi anir. Pai aibelen masür- Pa lemanji tajungtiba leman lir aser liasü. Asenok Temeshitiba nung lira, asenoki Tsüngremer leman bushitettsü. Asenoki Tsüngrem Temeshi o nung lira, asenoki Pa den temeshiba nung jajatettsü.

Tanabuba, Tsüngremer temang tzüym nung lir. Pa temang mimpanga lir. Asenoki Tsüngremi aniba ajakbo mangatettsü akok, saka ibai metettsü akok.: Tsüngremi ashir. Asaphi ashi, " Nai ne nübur san telok ama anishi"(t.20). Pa lenmang tzüym nung lir, aser pai anira, Pai tsüyimi na asoshi lapoktsütsü. Nüngdakra Pai na tsüma nung jajatsü yaritsü.

Saka ken züluri tatembang shidaki aru. Tsüngremer lenmangji temeshi, anungji pa dang tashi angang. Pa lenmang mimpanga lir, anungji amangang.

Tanü na timtem ka ajanga aor aser tasüngdangba aika asüngdang- kechiba, koda, kodang, kobika- Asaphi asüngdang. Pai anilen anidakba ajanga Tsüngremi na anasai arudakjang.

Taruba ita Asia Theological Association General Assembly agitsü

**July 01, 2025:** Asia shisatsü ajanga len anidaksütsü Theological Association (ATA) atema lenirtem arangshitsütsü. Triennial General Assembly Rara, lendong aser temenen August 11 nungi August 15 tashi kanga züinba putu mapang ka Taoyuan, Taipei nung nung lenirtemi pei tajaba tejangja ayongzüka agitsü. meteta lenitsüla aser Khrista mesüka tenzüka mapa inyaksüla.

Taküm iba assembly atema shimtetba omenji "Christ-Like Leadership Formation for Our Turbulent World" alitsü. Asia, South Pacific aser West Asia (Middle East) nung aliba linük 33 nungi ATA nung züngsema aliba Theological Institution 393 lir.

Anogo pongunü mungdang nungji plenary sessions aika alitsü, onük balala nung o lemteptsü, kaket ayoktsü aser tekülem sentong aika agitsü. ATA ya theological institutions network ka lir aser parnoki evangelical tamang mesükba nung lenirtem jenjang indaksütsü atema arangshitsütsü nükjidong nung inyakba den külemi Yisu ayongzü. Tanü putu nung Khristai tenyaba wadang mejangjaba tensa mapang ka nung lenirtem tamang aser nungiter.



## AO OSHI ANGAZÜKDAK: TANÜ ANGAZÜKTSÜBA OJANG



### Tepolong

(adj) Telonglong (round shape)

\* Tetsürtemi ang tepolong aika amshia sü ataker.

### Tepong

(adj) shiruru tebur dang ajaba ( male animal)

\* Sü tepong ya jenjang aketba shiruru ka lir.

## OLONG PAITEP # 7197

|    |  |   |    |   |    |   |   |    |  |    |
|----|--|---|----|---|----|---|---|----|--|----|
| 1  |  | 2 |    |   | 3  |   | 4 |    |  | 5  |
|    |  |   |    |   |    |   |   |    |  |    |
|    |  |   |    | 6 |    | 7 |   |    |  |    |
| 8  |  |   |    |   |    |   |   |    |  |    |
|    |  |   |    |   |    | 9 |   |    |  |    |
|    |  |   | 10 |   |    |   |   |    |  |    |
| 11 |  |   |    |   |    |   |   |    |  | 12 |
|    |  |   |    |   | 13 |   |   | 14 |  |    |
| 15 |  |   |    |   |    |   |   |    |  |    |
|    |  |   |    |   |    |   |   |    |  |    |
| 16 |  |   |    |   |    |   |   |    |  | 17 |

### TIPLIN

1. Zübu aket - (4)
3. Tachitsü tajung - (6)
7. Neptzü-pangtzü yima shirangba - (5)
8. Lenir / Nüngdakba nisung - (6)
9. Amena - (5)
10. Tain masü - (5)
11. Tachitsü yarir - (5)
13. Tatalokba nung dena liasü - (6)
15. Medemer tsüngda jatepba- (5)
16. Timtem / Tuoshi - (6)
17. Te \_ \_ \_ \_ wa - (4)

### LANGTSÜNGLEN

1. Yim tulu - (5)
2. Pe \_ \_ \_ \_ g - (4)
4. Tarutsü anogo tetzür - (6)
5. Meilungi ata jaja - (5)
6. K \_ \_ \_ \_ gser - (5)
9. Miima inyakba metet - (5)
10. Medemer tazüng - (6)
11. Aibelen amatok - (5)
12. Teimla ayu - (5)
14. Aji ta asüyonga - (4)

## OLONG PAITEP # 7196 TELANGZÜBA

### TIPLIN :

1. Tanga, 6. Wara, 7. Rajang,
9. Anük, 10. Jenjang, 11. Alar,
14. Ngashi, 15. Nala, 16. Mechi.

### LANGTSÜNGLEN :

2. Anga, 3. Yabang, 4. Tarok, 5. Orak,
8. Ainer, 9. Anema, 10. Jabili,
11. Among, 12. Miim, 13. Anem.

## NAI-A YA METETTER MA



Tang asaya aliba Wimbledon tebur kija asaya nung fifth-seeded Taylor Fritz aser Giovanni Mpetshi Perricard na asayaba mapang Perricard-i mezügbuba game nung service ka 153 mph nung aoba sülen Wimbledon nung otsü tasen ka yanglua tang tashi nung iba ya service aoba rongnung takaratiba kümogo. Taoba mapang Wimbledon nung service takaratiba ya Taylor Dent-i 2010 küm oa liasü. Pa indang service speed ya 148 mph liasü. Ajisüaka Perricard-i aoba service ya Fritz-i agizük aser point-a ngua liasü.

## Assam nung gas leak asüba ajanga kongshirtem nem teyari magütsüi lir


**Guwahati, Chiteni/July 1 (Agencies):** All Assam Engineers' Association (AAEA)-i, Rudrasagar oilfield kübok oil well 147A nung gas leak asüba June 27 nü takok ngua nembangtetba atema Oil and Natural Gas Corporation Limited (ONGC) indang crisis management team nem tenüngsang agütsüogo.

Association-isa, iba mapa nung teyari agütsüba bendanger mongin asem nema tenüngsang agütsüogo.

Kasa mapang nung AAEA-i, state-i sponsore asüba Maharatna company dang iba timtem ajanga kongshiba yimdaklirtem nem teyari agütsütsü asoshi sangdongtsü mepeshia metetdaksüogo. Item yimdaklirtem ya gas leak asüba ajanga hopta ana tashi pei ki toktsür aotsüsa aküm.

Iba lokti tentet yagisa, Asomiya nunger kibong 330, shirnok gas leak asüba ajanga anina liasü parnok nem teyari agütsütsü atema India nung crude oil and natural gas company tulutiba yagi anogo kwi agitsü ta asüngdang.

ONGC indang New Delhi nung amenoker aliba corporate communications team-i taoba mapang, June 12 nü service operations ka mapang Well



RDS#147A nungi gas pokteta adoka liasü, ta ashi.

Anogo 16 mongintem team kati kanga meranga inyakba sülen iba well ya nembangteta liasü.

ONGC-isa, iba inyakyim benoka inyakba mapang ochishia dang inyakago aser ken o dak sendaka alirtem nem osang agütsütsü atema anogoshia press release balala agüja aruba den takok tashi teküzmükba kübok inyaksangshitsü bendanga agüja inyaka aruogo, ta metetdaksü.

Temetetsü kaji Assam Chief Minister Himanta Biswa Sarma-i June 16 nü iba tesem semdangba mapang relief

camp tem nung jenoka aliba local tem den sensak asem aser CM indang relief fund nungi kibong shia nem sen 25,000 agütsütsü sangdonga liasü.

Pai, Union Petroleum and Natural Gas Minister Hardeep Singh Puri den tongtepratep aser ONGC mendenbuba Arun Kumar Singh dena ajurutepogo, shibai iba timtem ajanga kongshir aliba kibongtem nem tapet teyari agütsütsü nangzüka liasü.

Iba dak sendakba nung engineer tem indang lokti tentet yagi ONGC management dang tang tashi kechiba teyari ya magütsür ta asüngdangogo.

## Manipur nung Prepak-Pro telungpur ka apu

**Imphal, Chiteni/July 1 (Agencies):** Indian Army-i paramilitary force tem aser civil police den longjemer Kangleipak-Progressive (Prepak-Pro) indang People's Revolutionary Party züngsem ka puogo aser pa ket nungi bomb ka, communication device ka aser two-wheeler ka puogo.

Itangitertemi osang agütsüba dak ajemdaker Indian Army, Manipur Police, Assam Rifles, CRPF, BSF, aser ITBP nunger longjemer Thoubal district nung Thoubal Police Station kübok Charangpat Mamang Leikai

tesem meita aoba mapang Prepak züngsem ka ya Hombarnü pua liasü, ta defence wing-i Mongolbarnü metetdaksü.

Sepaitemi apuba nisungba ya Khundongbam Kalambiya Singh ta jangjaogo, shiba Heirol Part-II, Bazar nung alir.

Police-i ashiba agi, pa ya Thoubal temeket nung nüburtem dang nungi rakzükrakdemba, parnok amokmerenba, pur aoba aser tanga ozüng anemba inyakyim balala nung densema liasü.

Sepaitem yagi 36mm high-

explosive hand grenade ka, mobile phone ka, SIM card ka aser Bajaj Pulsar tanak ka pua liasü.

Osang ajanga ashiba agi, security force temi taoba hopta Jiribam, Bishnupur, Kakching, Tengnoupal, Imphal East, aser Imphal West kübok tesem balala meitaogo.

Sepaitemi telungpur telok balala nungi züngsem ti puogo aser parnok ket nungi hadir balala 43 ngutetogo, kong Improvised Explosive Devices (IEDs) pongu, grenade tem, injang aser tanga hadir balala densema lir.

## Assam: BJP worker temi CEM Debolal agintsü khanga longkak ait

**Haflong, Chiteni/July 1 (Agencies):** Assam kübok Haflong nung BJP worker noklang aikati North Cachar Hills Autonomous Council Chief Executive Member Debolal Gorlosa pa mapa nungi agintsü khanga District Commissioner indang office kima mener longkak aita liasü.

Longkak aitertemisa contractor tem nem magütsüi aliba bill tem tangsa tang agütsütsü ayongzüka liasü.

Longkak aitertem yagi Gorlosa-i BJP anema inyaksangshiba, ochi mashi inyakyim, pa mulungka nung yimsü asüba aser Dima Hasao district kübok tesem balala nung

ozüng alema inyaksangshiba maparen nung densema atema aitsüogo.

Longkak aitertemi Debolal Gorlosa mapa nungi agintsü khanga placard amener yimyim ayima liasü.

Taitsüba nung temelaba maka ali atsüngba, sorkar senotsü masyimi amshiba, ozüng alema mining mapa inyakba aser Constitution of India Sixth Schedule anema executive tashi alia amshiba densema lir.

"Debolal Gorlosa-i BJP yongtsü nunga bendanga amshir. Taoba MAC election nung pai külen BJP candidate tem atema nübo ayimba mapang

miima independent candidate shirnok BJP worker tem lir parnok nem senotsü teyari agütsü. Onoki official BJP candidate tem pusemer asünung CEM-i onok indang bill tem nokdanga ayur," ta Hatikhali constituency nungi party worker Rohit Hagjer-i ashi.

Paisa, independent candidate temi tang Constituency Development Committee (CDC) indang Chairman aser Vice-Chairman mapa bena lir ta ashi.

Hagjer-isa, July 15 nü tashi nung parnok takhangba mataloktsüra July 16 nü parnoki party toktsütsü ta tekümdangtsü metetdaksüogo.



# July ita atema Pakistan-i UN Security Council tir menden agizükogo

**Islamabad, Chiteni/July 01 (Agencies):** Pakistan-i July 2025 atema United Nations Security Council tir menden agizükogo ta Mongulbarnü ashi.

Pakistan indang Ministry of Foreign Affairs aser osang balala ajanga ashiba agi, 2013 sülenbo Pakistan asoshi ibai mezüngbuba tir menden lir.

Pakistang sorkar sangdong ka ajanga ashiba agi, Presidency ajanga July ita tongtipang senden ana jateptsü - July 22 nü "Promoting International Peace and Security through Multilateralism and the Peaceful Settlement of Disputes" indang o inteptsü aser July 24 nü "Cooperation between the United Nations and Regional and Sub-Regional Organisations" atema senteptsü.

Senden anaprong nung linük indang Deputy Prime Minister aser Foreign Minister Ishaq

Dar menden asütsü ta sangdong ajanga ashi.

June 30 nü Pakistan-i India dang Indus Water Treaty akhi ama amshitsü ajungshia liasü, koba New Delhi-i May ita nungi soita lir, aser tawa The Hague nung Permanent Court of Arbitration ajanga telemtetba agiba ajanga iba tezüngzüktep ya tang tashi takum lir ta sayur ta ashir.

Indus Waters Treaty indang pangzüng kübok projects ana nung keta aliba kar nung Pakistan-i tai apuba sülen Permanent Court of Arbitration inyakyim India-i kodanga agizüka mali.

Hokulbarnü India-i iba obendang khenyongi magizük aser parnoki kodanga Pakistan den mangatettep pangzüng atema framework magizük ta shia liasü.

India-i iba "supplemental award" ta ajaba magizüker, ta Ministry of External Affairs (MEA) ajanga Pakistan-i

Kishenganga aser Retle hydropower projects nung tai apuba dak sendakba ken o nung obendang indang ashi.

April 22 nü Pahalgam nung kiralongrar temi amakba sülen India-i Pakistan anema mera tesashi aika agiogo aser yangji Indus Waters Treaty of 1960 ya khen atema agiena yutsü.

Pakistan indang Foreign Office ajanga Hombarnü sangdong ka nung, Court of Arbitration ajanga June 27 nü supplemental award sangdongba yagi Indus Waters Treaty ya tejangja aser tamshidak ta Pakistan nem kuli agütsür aser India-i par sasa iba atema telemtetba agitsü temeden mali ta ashi.

"Onoki India dang tekeraba nung Indus Waters Treaty akhi ama inyaksü aser treaty obligations shidak tashi anga inyaksü ajungshir," ta ashi.

Ishaq Dar-ia court obendang ajanga IWT ya tang tashi lir ta jangjatsür, ta ashi.

# Cyprus-i summit ka atema Turkey tir Erdogan jaok

**Nicosia, Chiteni/July 01 (Agencies):** Cyprus-i Hombarnü sangdong ka ajanga ashiba agi, taruba küm European Union tir mapa abenba mapang parnoki summit ka nung shilem agitsü atema parnok tsükchir Turkey jaoktsü.

Ankara-i 1974 küm iba linük maka linük tasen ka jakzüka aoba pusemba ajanga küm aika tsükchitepa aruaka iba jenjang agitsü telemtetba agiogo.

Nicosia-i taruba küm mezüngbuba ita trok melentepba abenba EU tir mapa abentsü aser iba mapang Middle East nung ken o tem sensak asemtsü atema Turkish tir Tayyip Erdogan densema parnok meketa aliba linük lenirtem senden ka ayongzüka amentsü sentong lir, ta Cypriot

tir Nikos Christodoulides-i ashi.

"Nai geography memelenshitettsü- Turkey ya Republic of Cyprus indang kidangersa asütsü.. Iba summit atema Erdogan pelashishia jaoktsü, kong linük meketa aliba tesemtem terenlok atema sensak asemtsü," ta pai Nicosia nung osangbenertem dang ashi.

Christodoulides-i kasa ya taoba mapang British podcast ka nunga shiogo, koba Hombarnü sangdonga liasü. Iba mapang pai summit ya 2026 küm April ita agitsü sentong lir ta ashi.

Erdogan jaokba dak sendakba nung Reuters-i telangzüba agütsütsü mepeshi saka Turkey tir-i kecha telangzüba magütsü.

Cyprus aser Turkey na

diplomatic tsendaktep mali aser Turkey tir ka host asütsüji linük anaprongla atema temela masütsü, kechiyong taoba mapang mangatettep ajanga tesendaktep raksar lir.

1974 küm Turkey-i iba Mediterranean asetkong ya amakba sülen ana kuma lemdang aser Ankara-i, north Cyprus nung shingaia agizüka maliba state ka pusem aser sepaitem aika tokja liasü.

Christodoulides ya Greek Cypriot administration ka tekolak lir aser iba ya EU nung Cyprus ajunga tenüng nungi nokdaker, saka pa tashiji ceasefire line ka adena mamshiteter, koba ajanga iba asetkong ya north aser south kuma lemdangtsür.

Erdogan-i south ya khen danga semdanga mali.



Office of the

ASANGMA SHISASHIR TELUNGJEM

TENÜNGSANG AGÜTSÜR



Wb, N. Manen imsong aser Wt, I. Alila, jala **Kr, Benjongnaro Imsong**-i Nagaland Staff Selection Board (NSSB) ajanga ajaayanga agiba tatidang nung LDA cum computer Assistant (District) Works & Housing (NPWD) kubok takok tajung ngutetba asoshi Asangma Shisashir Telungjem (AST) mendenti ajanga tenüngsang aser tetushi tulu agütsür.

Tsüngremi tarutsü nung la taküm aser wadang maneni moajangma.

Sd/-  
IMKONGLIBA  
(President)

Sd/-  
TALIENLA  
(General Secretary)

SANGDONGER

Oboula Mayangchiba Semchir Longchar (Mongsentsünger) Kidong Telongjem Longjang yimkong senden 24.05.2025 anogo nung lemteba yamai sangdonger.

Oboula Mayangchiba Semchir Longchar Kidong toktsür tanga kidong yima aliba kibong ana (1) Yimnetsemak aser (2) Longritemjen tena den kinungertem aser anükapangtemia ashiba manga nung tanü nungi tena ozü kinunger inyakyim kecha nunga shilem malitsü ta sangdonger.

Oboula Mayangchiba Semchir Longchar Kidong Telongjem Ketdangpurtem.

Wb. Wangshi Longchar  
Tir

Wb. W. Yanger Longchar  
Tezülur

# Thailand court-i PM Paetongtarn Shinawatra mapa nungi anentsür

**Bangkok, Chiteni/July 01 (Agencies):** Taoba Cambodia lenir ka den phone nung jembiba temai adokba bushisüngdangtsü mechi Thailand Ato Kilonser Paetongtarn Shinawatra Mongulbarnü mapa nungi anenja atar. La mapa nungi anenja atatsü totuyuba ya Thailand indang Constitutional Court ajanga agütsü.

Tebu aser taoba ato kilonser Thaksin Shinawatra ya chuba yimli tenüng menüksü ta tai tonglokja court nung nokdakba anogo nung arishi küm 38 tain Paetongtarn asoshia iba totuyuba ya agütsü.

Lai yimya meshidak amshi ta tai tonglokja petition agüja la mapa nungi anenja atatsü asoshi obendanger temi Mongulbarnü vote 7-2 agüja liasü.

Cambodia den tang tesüsa arütsü nung mangatettep adoka aliba Paetongtarn-i ketdangsuba nung temulung masüba tali kuma liasü. May 28 nü arütsü nung mangatettep adokba mapang Cambodian sepai ka tepset.

Lai arütsü nung mangatettep aliba atema phone ajanga yimjung ken o jembiba temai adokba ajanga nüburtemi ashishia longkak aita liasü.

Paetongtarn ya ato kilonser kumer küm ka majung lia mapa nungi anenja atar aser Constitutional Court ajanga arütsü nung mangatettep adoka aliba mapang lai ministerial

ethics nung aibelen asü masü ta jembitsü.

Cambodia den mapang talangka nungi arütsü tsütsü mangatettep adoka aliba May ita tamajungba kuma Cambodian sepai ka tepset.

Paetongtarn-i taoba Cambodia lenir Hun Sen den phone ajanga iba indang jembidang lai pa dang "uncle" ta aja aser Thai military commander ka lar "opponent" ta ashi, ta iba phone recording temai adokba nung shia lir.

Conservative lawmakers temi lai Cambodia matsüngdang apudaker aser mitkar tashi mait kumdaktsür ta tai tongloktsü aser lai constitution ozüng nung aibelen ta aitsür.

La mapa nungi anentsüba mapang court inyakyim agizüktsü aser anidaktsü, ta Shinawatra-i ashi.

Ano Office of the National Anti-Corruption Commission-ia Paetongtarn anema 'breach of ethics' ken o benoka bushisüngdang, aser iba commission telemtetba ajanga la mapa nungi anentsütsü akok.

Paetongtarn mapa nungi anentsü khanga Honibarnü central Bangkok nung conservative aser nationalist meyirijang aikati longkak aita liasü.

Iba chuba yimli indang yimtenren ya küm aika conservative, pro-military, pro-loyalist elite aser Shinawatra kin tsüngta atsütepa arua liasü.

OVERNMENT OF NAGALAND

DIRECTORATE OF A.H.& VETERINARY SERVICES

NAGALAND : KOHIMA

ADVERTISEMENT

Dated Kohima the Jun. 2025

NO.VET/EST/APP/222/2025-26/ : In pursuance to the approval of the government of Nagaland,vide NO.AHV/EST-1/27/2011/Pt-V/540 Dated Kohima the 8th Apr 2025, applications are hereby invited from indigenous inhabitant of Nagaland for filling up the post of Driver(Group-c)against retirement vacancy under the Department of Animal Husbandry & Veterinary Services.

| Sl.No. | Name of Post         | No. of Post | Pay Matrix Level   | Reservation |
|--------|----------------------|-------------|--------------------|-------------|
| 1      | Driver (Directorate) | 2           | Level-3 (ROP 2017) |             |
| 2      | Driver (District)    | 2           | Level-3 (ROP 2017) |             |

Terms and conditions:

1. Age as on 01.01.2025 : Minimum-21 years and Maximum-32 years

Note: Upper age limit is relaxable by :

a) 5(five) years for candidates belonging to ST.

b) Age relaxation for serving Government Employee will be allowed, the equal number of years they are in service to a maximum of 5(five) years.

2. Reservation of quota shall be as per Government Office Memorandum and Notification.

3. Documents Required:-

a) Educational qualification certificates.

b) Birth Certificate.

c) Driving licence.

d) Medical fitness certificate.

e) Indigenous/Scheduled Tribe/Backward Tribe/Aadhar.

f) 2(Two) Nos. of recent Passport size photos.

g) NOC from HoD for Government employees(in original)

h) An amount of Rs.200/- shall be charged as Application/Exam fee.

4. Application should be addressed to the Director of AH & Veterinary Services,Kohima.

5. Last date for submission of application will be on or before12/07/2025.

6. Applications received after the closing date or with incomplete documents will be summarily rejected.

7. Admit card shall be issued from Directorate of AH & Veterinary Services,Kohimaon 14/07/25 during office hour.

8. The date of interview for shortlisted candidates is fixed on 17 & 18 of July 2025 at Directorate of AH & Veterinary Services,Kohima.

Sd/- DR. B.M SUNEPA

ADDL. DIRECTOR &HoD

A.H.& VETERINARY SERVICES

NAGALAND, KOHIMA



## 24buba Dr. T. Ao Inter-District Football championship Kohima nung asayatsü

**Kohima, Chiteni/July 1 (TYO):** Ajaki yonga ata-aliba 24buba Dr. T. Ao Inter-District Football Championship 2025 August 1 nü tenzüksü aser August 15 nü tembangtsü. Iba asayamung ya Kohima DPDB-i host süa asayatsü.

IG Stadium Kohima nung osangbenertem den sensaksemba mapang Nagaland Football Association (NFA) tir K Neibou Sekhose aser Kohima district nungi Deputy Commissioner & organizing committee member secretary B. Henok Buchem-i anir ketdangsürtemi iba asayamung mapanglem, temzüng ozüng aser team telesa metetdakja liasü.

Iba sentong ya asayamung indang poster aser media campaign saya-a tenzüksü aser iba sülen asayamung atema renemshiba indang, asayamung nung asayatsü temsüa alirtem indang aser technical inyakyim balala indang metetdakja liasü.

Neibou Sekhose-i iba asayamung ya koda

tongtibang aser Nagaland nung football asaya iba dak yangloka aliba indang lemsatep. Paisa, India indang mezüngbuba Olympic football captain Dr. T. Ao nem tetushi agütsü, shiba linük saisabong puti otsü nung tongtibang nisung ka lir.

Sekhose-isa, Dr. T. Ao tenüng nung asayaba asayamung ya tokteptsü kija atema masü saka iba ya telongjem, maongka aser tekübokba jenjang nungi sempet aketba asayartem ajungkettsü atema lir, ta ashi.

Iba asayamung ya league-cum- knockout format nung asayatsü, kong Nagaland kübok districts 17 pronglai shilem agitsü. Asayamung akokba team nem senpet sen lakh 3, runner-up nem lakh 1.50 aser district ajak nem asayamung atema renemshiba mapang teyari ama sen 50,000 agütsü.

Pei district council mesüra deputy commissioners-i kuli tejangja agütsüba Nagaland lisopurtem dang iba asayamung nung asayatsü,

ta pai ashiba den, sorkar tenzüker mesüra defense personnel ama district ka nung mapa inyaka aliba asayartema arla kar kübok asayatsü.

Ketdangsürtemi ashiba agi, asayartem shirnoki pei district team nungi asayatsü memulunger parnok Nagaland Super League densema state tenüng nungi masayadaksütsü.

District association temdanga asayartem meshimra parnok chioktsü asoshi mepeshia metetdaksüogo.

Asayamung atema renemshi tenzükgogo aser 2025 küm Dr. T. Ao Trophy ya Nagaland nung football benjung tulutiba ka asütsü.

Asayamung atema telok telesa yamai alitsü:

### GROUP A:

Tuensang, Mon, Shamator, Niuland & Zunheboto

### GROUP B:

Longleng, Chümoukedima, Noklak & Dimapur

**Group C:** Mokokchung, Wokha, Phek & Kiphire

**Group D:** Peren, Kohima, Tseminyu & Meluri

## Europe Tour atema India A squad sangdongogo



**Chiteni/July 1, 2025 (Agencies):** Hockey India-i Mongolbarnü taruba European tour atema India A Men's Hockey Team squad sangdongogo, koba July 8 nungi 20 tashi asayatsü.

Iba tour nung India team Europe nung temaba jenjang nung aliba team kar den asaya ti asayatsü, koba asayar tasen aser tejentem ajak atema international jenjang nung tajangshiba tajung ka asütsü.

India A team Ireland, France, aser Netherlands den asaya anana asayatsü aser England o Belgium na den asaya kaka asayatsü.

Asayar 20 agi kümteba

squad nung asaya tejen aser tasentem meyoktepa lir, shirnoki domestic aser international nung junga asayaogo. Team captain Sanjay aser vice captain Moirangthem Rabichandra Singh asütsü.

Tour mapang team ya coach Shivendra Singh lenisüba nung asayatsü, shiba tebur team assistant coach lir. Pa ya tajangshiba aika bena aliba coach ka shiba attack süa asayaner.

Tour indang jembiba mapang Shivendra-i ashiba agi, "iba tour ya asayartem atema European hockey tempo, structure, aser inten-

sity metettsü asoshi tongtibang sabang ka asütsü. Team nung asayar tejen aser tasentem ajak meyoktepa lir aser iba tour ya taruba India nung international asayartem anitettsü asoshi kanga tajangzüksü tulu asütsü."

India A team Europe nung mezüngbuba asaya July 8 nü Ireland den asayatsü.

Iba tour ya asayartem manügi anitettsü aser tarutsü nung India tenüng nungi asayatsü aliba asayartem nem international jenjang nung asaya-a tajangshiba agütsütsü atema maongka agütsütsü asoshi Hockey India sentong nung shilem ka lir.

## Angati TT coaching camp aka

**Dimapur, Chiteni/July 1 (TYO):** Shamator District Table Tennis Association den DHEW Shamator aser Nasha Mukht Bharat Abhiyan nunger longjemer July 1 nü Multi Sports Stadium nung angati Table Tennis Summer Coaching Camp ka ayongzüksü agiogo.

Iba coaching camp ya "Say No to Drugs, Say Yes

to Sports" omen nung ajemdaker agia liasü.

July 1 nü iba sentong ya Khetsula DHEW lenisüba nung agi aser SDTTA tir EAC Shamator, I. Yentinoungbou-i lokti pela gizükba o jembi aser SDO (C) Shamator HQ, Athrong-i o tatsüka jembia liasü. Iba camp atema nisung 60 züngoksema liasü.

## India-i Bangladesh semdangtsü mesemdangtsü mejangja: BCB

**Chiteni/July 1, 2025 (Agencies):** Bangladesh Cricket Board (BCB) tir Aminul Islam-i ashiba agi, August ita India team-i Bangladesh semdangtsü mesemdangtsü iba indang BCCI-i tang tashi osang agüja mali.

April ita BCB-i, India team-i Bangladesh semdanga asaya balala asayatsüba indang mapanglem sangdongogo, kong August 17, 20 aser 23 nü ODI asem asayatsüba aser iba sülen August 26, 29, aser 31 nü T20I asem asayatsüba densema liasü. Asayatem ya Mirpur aser Chattogram na nung asayatsü sentong yanglur lir.

Islam-i ashiba agi, BCCI-i iba asayamung atema India sorkar den sensak asema sülenang telemteba ka agitsü sentong lir.

"Ni BCCI den sensak semato kogo. Sensaksem kanga takok ngua agiogo," ta Aminul-i Hombarnü Sher-e-Bangla Aminul-i ashi.

## Tammy Abraham Besiktas nung adentsü renema lir

**Chiteni/July 1, 2025 (Agencies):** England nunger forward Tammy Abraham Roma nungi Besiktas nung adentsü renema lir.

Iba Turkish club yagi Abraham alizüktsü atema jembishinüa aruogo, aser parnok indang social media nung arishi küm 27 tain asayar ya tenangzüktepba yanglutsü atema aoba mapang agiba video ka lemsatepa liasü.

"Hello Black Eagles, ni

nenok dangi arur. Tanü airport nung ajurutepti," ta Abraham-i iba post nung ashi.

Abraham ya taoba season AC Milan nung loan nung oa asaya aser pai goal 10 idakja liasü, ajisüaka parnok pa teti atema alizüktsü asoshi jenjang magi.

"Goal double digits idaktsüba den asayaba minute ajak bendanga agüja asayaogo! Tammy kanga pelar," ta Milan-i pai club toksüba indang sangdongba mapang zülutsü.

## BILEMDANGANG

"Taginüba aser tejangraba na bendangtetang."